

REGIONAL NEWS UNIT
ALL INDIA RADIO, AGARTALA

Date: 18-12-2017

Time: 07:55-08:05 PM Hrs

BENGALI EVENING BULLETIN

Headlines :

- (১) বি জে পি গুজরাট ও হিমাচল প্রদেশ নির্বাচনে নিরঙ্কুশ সংখ্যাগরিষ্ঠতা লাভ করেছে।
- (২) স্বাস্থ্যমন্ত্রী বাদল চৌধুরী হাসপাতালের ডাক্তারদের, রোগীদের ব্যবস্থাপত্রের জেনেরিক ওষুধের নাম লেখার আহ্বান জানিয়েছেন।
- (৩) প্রধানমন্ত্রী নরেন্দ্র মোদী আগামী ২০১৮ কে ইতিবাচক মনোভাব, সুখ, শান্তির বার্তা নিয়ে বরণ করার অনুরোধ করেছেন।
- (৪) ও এন জি সির উদ্যোগে লাকি শ্রীবাস্তব স্মৃতি প্রাইজমানি আমন্ত্রনমূলক ফুটবলের আসরে উদয়পুরের বরক ফুটবল একাডেমি সেমি-ফাইন্যালে উঠেছে।

ইলেকশন-গুজরাট, হিমাচল :

বি.জে.পি গুজরাট ও হিমাচল প্রদেশে নিরঙ্কুশ সংখ্যাগরিষ্ঠতা লাভ করেছে। গুজরাটে বি জে পি ষষ্ঠবারের জন্য ক্ষমতায় এলো। জানা গেছে মোট ১৮২টি আসনের মধ্যে বি জে পি ৯৯টি আসন পেয়েছে এবং বিরোধী

কংগ্রেস ৮০টি আসন পেয়েছে। NCP পেয়েছে একটি আসন এবং নির্দল প্রার্থীরা ২টি আসন পেয়েছে। গুজরাটের মুখ্যমন্ত্রী বিজয় রূপানি বলেছেন, এই জয় কংগ্রেসের জাতি ভিত্তিক রাজনীতির বিরুদ্ধে উন্নয়নের জয়। তিনি বলেন, দলের কেন্দ্রীয় সংসদীয় পরিষদ মুখ্যমন্ত্রীর বিষয়ে চূড়ান্ত সিদ্ধান্ত নেবে। গুজরাতে বিজয়ী বিশিষ্টদের মধ্যে রয়েছেন মুখ্যমন্ত্রী বিজয় রূপানী, শিক্ষামন্ত্রী ভূপেন্দ্র সিং চুরাসমা এবং বনমন্ত্রী গনপত ভূসাবা। এদিকে, রূপানী সরকারের ৬ জন মন্ত্রী এবার পরাজিত হয়েছেন। এরা হলেন শঙ্কর চৌধুরী, আত্মারাম পরমার, চিমনভাই সাপোরিয়া, যশাভাই বারোড এবং কেশাজি ঠাকুর। গুজরাট বিধানসভার অধ্যক্ষ রমনলাল ভোরাও পরাজিত হয়েছেন। কংগ্রেস আমরেলী এবং গির সোমনাথ জেলায় ৫টি আসনেই জয়লাভ করেছে। বরিষ্ঠ কংগ্রেস নেতা পরেশ ধানানি আমরেলিতে জয়ী হয়েছেন। কংগ্রেসের শীর্ষ নেতা অর্জুন মোডওয়াড়িয়া, শক্তিসিং গোহিল এবং সিদ্ধার্থ প্যাটেল পরাজিত হয়েছেন। এদিকে, হিমাচল প্রদেশে বর্তমান মুখ্যমন্ত্রী বীরভদ্র সিংহ আরকী বিধানসভা কেন্দ্র থেকে জয়লাভ করেছেন। প্রাক্তন মুখ্যমন্ত্রী প্রেম কুমার ধূমল সুজানপুর কেন্দ্রে পরাজিত হয়েছেন। হিমাচল প্রদেশে বি জে পি ৪৪টি আসন, কংগ্রেস ২১টি আসনে এবং অন্যান্যরা ৩টি আসনে জয় লাভ করেছেন।

প্রধানমন্ত্রী-ইলেকশান :

প্রধানমন্ত্রী নরেন্দ্র মোদি বলেছেন, গুজরাট ও হিমাচল প্রদেশের জয়, সুশাসন এবং উন্নয়নের রাজনীতির প্রতি জনগণের সমর্থনকেই প্রতিফলিত করে। এক টুইটবার্তায় শ্রী মোদি BJP কর্মীদের কঠোর পরিশ্রমের জন্যই এই জয় বলে উল্লেখ করে তাদের প্রশংসা করেন। তিনি উভয় রাজ্যের জনগণকে BJP'র উপর আস্থা রাখার জন্য তাদের অভিনন্দন জানান। প্রধানমন্ত্রী জনগণকে

এই আশ্বাস দেন যে, রাজ্যগুলির উন্নয়নের জন্য সরকার নিরলসভাবে কাজ করে যাবে।

কংগ্রেস :

কংগ্রেস আজ বলেছে, গুজরাটের জনগণের কাছ থেকে এবারের নির্বাচনে অহংকারী বি জে পি শিক্ষা পেয়েছে। নতুন দিল্লীতে দলের মুখপাত্র রণদীপ সিং সূর্যেওয়াল ব বলেন, তুলা ও বাদাম চাষীদের সমস্যা, বেকারত্ব ও গুজরাটের ব্যবসায়ীদের বিষয়টি কংগ্রেস নতুন সরকারের সামনে তুলে ধরবে। বরিষ্ঠ কংগ্রেস নেতা এবং গুজরাটে দলের ভারপ্রাপ্ত অশোক গেহলাট বলেন, নির্বাচনী প্রচার খুবই ভালো ছিল। প্রাক্তন স্বরাষ্ট্রমন্ত্রী ও হিমাচল প্রদেশের দায়িত্বপ্রাপ্ত সুশীল কুমার সিন্ধে বলেছেন, গত ৫ গত ৫ বারের মধ্যে BJP ও কংগ্রেস পরিবর্তভাবে ক্ষমতায় এসেছে।

আলোচনাচক্র :

স্বাস্থ্যমন্ত্রী বাদল চৌধুরীর পৌরহিত্যে অল ত্রিপুরা গভর্নেন্ট ডক্টরস এসোসিয়েশনের উদ্যোগে আগরতলা মেডিক্যাল কলেজে আজ এক বৈঠক হয়। বৈঠকে হাসপাতালে ভর্তি থাকা রোগীরা যাতে কমপক্ষে ৮০ শতাংশ ওষুধ হাসপাতাল থেকে বিনা পয়সায় পান এবং চিকিৎসকরা যাতে ব্যবস্থাপত্রে জেনেরিক মেডিসিনের নাম লেখেন তার উপর গুরুত্ব আরোপ করা হয়। হাসপাতালে সরকারী সরবরাহ কৃত ওষুধ লিখতে এবং অন্য কোম্পানীর ওষুধ না লেখার জন্যও চিকিৎসকদের প্রতি আহ্বান জানানো হয়। স্বাস্থ্য অধিকর্তা বলেন, আই জি এম, জি বি এবং ক্যান্সার

হাসপাতালে ইমার্জেন্সি ওষুধ কেনার জন্য প্রতি মাসে ২ লক্ষ টাকা থেকে ৩ লক্ষ টাকা দেওয়া হচ্ছে, যাতে অন্তর বিভাগের রোগীরা সব রকম ওষুধ হাসপাতাল থেকে বিনা খরচে পান।

নির্বাচন কমিশন :

আগামী ছয় মাসের মধ্যে যে সমস্ত কর্মচারী অবসর গ্রহণ করবেন তাদের রাজ্যে আসন্ন বিধানসভা নির্বাচনে কোন দায়িত্ব দেয়া যাবে না বলে জানিয়েছে নির্বাচন কমিশন। সম্প্রতি কমিশনের পক্ষ থেকে এ সংক্রান্ত একটি নির্দেশিকা মুখ্যসচিব ও মুখ্য নির্বাচনী আধিকারের কাছে পাঠানো হয়েছে। নির্দেশিকায় আরো উল্লেখ করা হয় যে, অবসরের পর পুনঃনিযুক্তি পাওয়া কোন কর্মচারীকে নির্বাচনের কাজের কোন দায়িত্ব দেয়া যাবে না। তবে মুখ্য নির্বাচনী আধিকারিকের অফিসে কর্মরত পুনঃনিযুক্তি পাওয়া কর্মচারীদের এই নিষেধাজ্ঞার আওতার বাইরে রাখা হয়েছে। যে সমস্ত অফিসার ও কর্মচারীর বিরুদ্ধে ফৌজদারী মামলা আদালত বিচারাধীন রয়েছে তাদেরও নির্বাচনের কাজের দায়িত্ব যা দিতে নির্দেশিকায় উল্লেখ করা হয়েছে। তাছাড়া, রাজ্যে বিগত নির্বাচনগুলিতে নির্বাচনের কাজে অনিয়ম বা গাফিলতির দায়ে অভিযুক্ত কোন অফিসার বা কর্মচারী থাকলে তাদেরও নির্বাচনের কাজের কোন দায়িত্ব দেয়া যাবে না বলে নির্দেশিকায় উল্লেখ করা হয়েছে।

BJP :

গুজরাট ও হিমাচল প্রদেশে BJP'র জয়ে প্রধানমন্ত্রী নরেন্দ্র মোদি ও দলের সর্ব ভারতীয় সভাপতি অমিত শাহকে অভিনন্দন জানিয়েছেন প্রদেশ বি জে পি সভাপতি বিপ্লব দেব ও পর্যবেক্ষক সুনীল দেওধর। অভিনন্দন বার্তায় তারা বলেছেন, এই জয়ের প্রভাব পড়বে রাজ্যেও। উন্নয়নের ইস্যুতেই রাজ্যে ভোট হবে বলে তারা জানিয়েছেন। এদিকে, দুই রাজ্যের বি জে পি'র জয়ে রাজ্যেও বিজয় মিছিল করে বি জে পি। আগরতলায় বি জে পি'র সদর দপ্তর থেকে এই মিছিলটি বের হয়ে বিভিন্ন পথ পরিক্রমা করে। মিছিলে ছিলেন দলের শীর্ষ নেতৃত্ব।

বিজয় মিছিল-কৈলাসহর :

গুজরাট ও হিমাচল প্রদেশে BJP'র বিজয়-এর কারণে আজ কৈলাসহরে বিজয় মিছিল হয়। আবির্ খেলায় মেতে উঠেন দলীয় কর্মী সমর্থকরা। বিজয় মিছিলে ছিলেন BJP'র রাজ্য সম্পাদক নীতিশ দে, দলীয় নেত্রী বিলকিস জাহান প্রমুখ।

প্রধানমন্ত্রী :

প্রধানমন্ত্রী নরেন্দ্র মোদি আগামী ২০১৮ কে ইতিবাচক মনোভাব, সুখ, শান্তির বার্তা নিয়ে বরণ করার জন্য অনুরোধ করেছেন। তিনি সকলকে অনুরোধ জানান যাতে ২০১৭ সালের ৫টি ইতিবাচক অভিজ্ঞতা ছোটগল্প, ভিডিও অথবা ছবির মাধ্যমে শেয়ার করবে যাতে অন্যান্য নাগরিকরা উদ্বুদ্ধ হতে পারেন। এ মাসের ২৫ তারিখ পর্যন্ত www.mygov.in portal যে জনগণ তাদের অভিজ্ঞতা শেয়ার করতে পারবেন বলেও প্রধানমন্ত্রী জানান।

সংসদ :

সংসদের উভর কক্ষের কাজ আজ দিনের জন্য স্থগিত হয়ে যায়। বিরোধী কংগ্রেস দলের সদস্যরা আজ উভয় কক্ষে প্রধানমন্ত্রী নরেন্দ্র মোদীর ক্ষমা চাওয়ার দাবী হৈ-চৈ শুরু করলে সংসদের কাজকর্ম বন্ধ করে দেওয়া হয়। প্রাক্তন প্রধানমন্ত্রী ড: মনমোহন সিংহের বিরুদ্ধে প্রধানমন্ত্রীর করা বক্তব্যের বিরোধীতা করে লোকসভায় ক্ষমা প্রার্থনা দাবী করেন প্রবীন কংগ্রেস নেতা মল্লিকার্জুন খাড়গে। রাজ্যসভা আনন্দ শর্মা এই দাবী জানান।

Election Commition :

কংগ্রেস সভাপতি রাহুল গান্ধীকে দেওয়া কারণ দর্শানোর নোটিশ প্রত্যাহার করে নিল নির্বাচন কমিশন। গুজরাটে নির্বাচন চলাকালীন আদর্শ আচরণবিধি ভঙ্গের অভিযোগে এই নোটিশ জারী করা হয়েছিল। কমিশন জানিয়েছে-যে ধারায় এই নোটিশ জারী করা হয়েছিল তা বর্তমানে পর্যালোচনাধীন রয়েছে। নির্বাচন কমিশন আরো স্থির করেছে যে বর্তমানে যোগাযোগ প্রযুক্তির উন্নতির সাথে সঙ্গতি রেখে প্রচারের ক্ষেত্রে সংশোধন আনার জন্য একটি প্যানেলও তৈরী করা হবে। এই প্যানেল নির্বাচনের ৪৮ ঘন্টা আগে প্রচার বন্ধ সংক্রান্ত ব্যাপারে প্রয়োজনীয় পরিবর্তন আনার ব্যাপারে নানা বিষয় খতিয়ে দেখবে।

নির্বাচন কমিশন-কৈলাসহর :

কুমাঘাট মহকুমাধীন ৫০নং পাবিয়াছড়া ও ৫১নং ফটিকরায় বিধানসভা কেন্দ্রের ভোট গণনা কেন্দ্র মহকুমার পাবিয়াছড়া স্কুলে করার জন্য নির্বাচন কমিশনে প্রস্তাব পাঠানো হয়েছে। কুমাঘাটের এস.ডি.এম মুক্তিপদ পাল জানান, জেলা নির্বাচন আধিকারিকের মাধ্যমে এই প্রস্তাবটি পাঠানো হয়েছে। উল্লেখ্য, ২০১৩ সালে অনুষ্ঠিত বিধানসভার ভোটে উল্লেখিত দুটি কেন্দ্রের গণনা হয়েছিল কৈলাসহরে।

কংগ্রেস-কৈলাসহর :

কংগ্রেসের পক্ষ থেকে আজ কৈলাসহরের এস.ডি.এম-এর কাছে স্মারকপত্র প্রদান করা হয়। সংখ্যালঘু সম্প্রদায়ের জন্য কর্মসূজন কর্মসূচী বাস্তবায়নে স্বচ্ছতা বজায় রাখা, প্রাকৃতিক বিপর্যয়ে ক্ষতিগ্রস্তদের সহায়তা প্রদানের দাবী জানানো হয়। আজকের কর্মসূচীতে অংশ নেন, PCC'র সাধারণ সম্পাদক রুদ্রেন্দু ভট্টাচার্য, জেলা কংগ্রেস সভাপতি মো: বদরুজ্জামান প্রমুখ।

যুব উৎসব-পানিসাগর :

পানিসাগর টাউন হলে আজ অনুষ্ঠিত হয় ব্লক ও নগর পঞ্চায়েত ভিত্তিক যুব উৎসব। উৎসবের উদ্বোধন করেন উত্তর ত্রিপুরা জিলা পরিষদের সভাধিনেত্রী প্রতিমা দাস। উপস্থিত ছিলেন বিধায়ক সুবোধ দাস, নগর পঞ্চায়েতের চেয়ারপার্সন অরুঙ্কুতি দাস, পঞ্চায়েত সমিতির চেয়ারম্যান শীতল দাস। এখানে ১৩টি বিভাগে প্রতিযোগিতায় ৬৬ জন অংশ নেন।

কর্মশালা :

তুলাশিখরের বাচাইবাড়ি জোনাল অফিসে আজ জেলার মহিলাদের বিষয়ে এক সচেতনতামূলক কর্মশালার আয়োজন করা হয়। এই শিবিরের উদ্বোধন করেন TTAADC-এর চেয়ারম্যান ড. রণজিৎ দেববর্মা। তাছাড়া, রাজ্য মহিলা কমিশনের চেয়ারপার্সন মণিকা দত্ত রায় সহ অন্যান্যরাও উপস্থিত ছিলেন। শিবিরে মহিলাদের উপর নির্যাতনে প্রতিরোধের বিষয়ে আলোচনা হয়।

ডা: সলিল সাহা :

বিশিষ্ট শল্য চিকিৎসক ডা: সলিল সাহা গতকাল শেষ নিঃশ্বাস ত্যাগ করেন। ডা: সাহা ত্রিপুরা মেডিক্যাল কলেজে নিয়মিত আসতেন এবং অপারেশন করতেন। তিনি মূলত: আগরতলার খয়েরপুর এলাকায় বড় হয়েছেন। মৃত্যুকালে স্ত্রী এবং দুই সন্তান রেখে গেছেন। গত লোকসভা নির্বাচনে তিনি আম আদমি পার্টির হয়ে পশ্চিম ত্রিপুরা আসনে প্রতিদ্বন্দিতা করেছিলেন।

শিবির :

TSR থার্ড ব্যাটেলিয়ানের উদ্যোগে আজ কচুছড়া ব্যাটেলিয়ানের হেড কোয়ার্টারে অনুষ্ঠিত হয় মেগা চক্ষু ও রক্তদান শিবির। শিবিরের উদ্বোধন করেন বিধায়ক ললিত কুমার দেববর্মা। রক্তদান শিবির ১৩৫ জন TSR জওয়ান স্বেচ্ছায় রক্তদান করেন। তাছাড়া ১৫ জন মরণোত্তর চক্ষু এবং ১৭ জন দেহ দান করেন। অনুষ্ঠান শেষে TSR থার্ড ব্যাটেলিয়ানের পক্ষ থেকে

দুঃস্থ ৫০ জনকে শীতবস্ত্র এবং স্কুল পড়ুয়া ছাত্রছাত্রীদের মধ্যে স্কুল সামগ্রী বিতরণ করা হয়।

চক্ষু চিকিৎসা শিবির :

পশ্চিম ত্রিপুরা জেলা অন্ধ্র নিবারণী সমিতির উদ্যোগে আজ তেলিয়ামুড়া মহকুমা হাসপাতালে চক্ষু চিকিৎসা শিবির অনুষ্ঠিত হয়। শিবিরে চক্ষু বিশেষজ্ঞগণ ৪৫ জনের চোখ পরীক্ষা করে বিনামূল্যে প্রয়োজনীয় ঔষধ প্রদান করেন। তেলিয়ামুড়া মহকুমা হাসপাতালের পক্ষ থেকে এতথ্য জানানো হয়েছে।

ও.এন.জি.সি ফুটবল :

ও এন জি সির উদ্যোগে লাকি শ্রীবাস্তব স্মৃতি প্রাইজমানি আমন্ত্রণমূলক ফুটবলের আসরে উদয়পুরের বরক ফুটবল একাডেমি সেমি-ফাইন্যালে উঠেছে। উমাকান্ত মিনি স্টেডিয়ামে আজ বিকেলে বরক ফুটবল একাডেমি ১-০ গোলে ত্রিপুরা পুলিশকে পরাজিত করে। এদিকে, একই মাঠে সকালে অনুষ্ঠিত খেলায় মনিপুরের সাক দল জয় পায়। সাডেন ডেথ পর্যন্ত লড়াই করে সাক দলটি ১০-৯ গোলে মিজোরামের চানমারী ফুটবল দলকে হারিয়ে দেয়। নির্ধারিত ও অতিরিক্ত সময়ের খেলা ৩-৩ গোলে ড্র ছিল। পরে সাডেন ডেথ-এ ম্যাচের মীমাংসা হয়।

কোচবিহার ট্রফি :

কোচবিহার ট্রফি অনূর্ধ্ব ১৯ বছরের ক্রিকেটের আসরে হিমাচল প্রদেশের বিরুদ্ধে লিড হারিয়ে চাপে রয়েছে ত্রিপুরা। হিমাচলের আমতारे ম্যাচের দ্বিতীয় দিনে আজ ১ উইকেটে ৩৭ রান থেকে খেলতে নেমে রাজ্যদল প্রথম ইনিংসে সবকটি উইকেট হারিয়ে ৯৯ রান সংগ্রহ করতে সক্ষম হয়। দলের পক্ষে বাবুল দে ৩৪ ও শংকর পাল ২৫ রান করে। হিমাচলের এস. জামওয়াল ৩১ রানে ৫ টি উইকেট পায়। ১০৯ রানে এগিয়ে থেকে দ্বিতীয় ইনিংসে খেলতে নেমে হিমাচল প্রদেশ দিনের শেষে ৬ উইকেটে ২৩৬ রান তোলে। দলের এম.এরসলান খান ১০১ রান করে। রাজ্যদলের শঙ্কর পাল ৭৯ রানে তিনটি উইকেট পায়। এর আগে স্বাগতিক হিমাচল প্রদেশ প্রথম ইনিংসে ২০৮ রান করেছিল।

এ ডিভিশন :

চন্দ্র স্মৃতি প্রথম ডিভিশন লীগ ফুটবলের খেতাব দখলের লড়াই-এ আগামীকাল এগিয়ে চলো সংঘ খেলবে ব্লাড মাউথ ক্লাবের বিরুদ্ধে। উমাকান্ত মিনি স্টেডিয়ামে নির্ণায়ক এই ম্যাচটি হবে। উল্লেখ্য, দুই ম্যাচের ফাইনালের লড়াই-এ প্রথম ম্যাচটি গোলশূন্য ভাবে শেষ হয়েছিল।

আবহাওয়া :

আগামীকাল আকাশ পরিষ্কার থাকবে। সকালে কুয়াশা পড়বে। তাপমাত্রা সর্বোচ্চ ২৭ ডিগ্রী এবং সর্বনিম্ন ১৪ ডিগ্রি সেলসিয়াসের কাছাকাছি থাকবে। আজ দিনের তাপমাত্রা ছিল সর্বোচ্চ ২৫.৫ ডিগ্রী এবং সর্বনিম্ন ১৬.২ ডিগ্রী সেলসিয়াস।

* * * * *